

Il duce Pemon e l'inizi de scuele ducâl di Cividât

Al principi e ae fin dal ducât langobart dal Friûl o cjatìn dôs dinastiis: fra chê e chê altre a passin a pene uns cincuante agns, dulà che si dan la volte, fra lotis e disordins, uns dîs duchis di divierse e no simpri clare divignince.

La dinastie a cjâf dal principât, che al vignì istituît tal 568, e fo chê dai Alboins: il prin duce al è Gjsulf, nevôt dal re (muart tal 610), po o cjatìn i siei doi fiis Taso e Caco (muarts prime dal 616), in fin al rive so fradi Grasulf (muart prime dal 680).

Chê altre dinastie, vignude fûr cincuante agns daspò e durade scuasit altris cincuante agns (703-749), e fo chê di Pemon, al cuâl i succederin i fiis Ratchis e Astolf, che a deventarin po daspò rês dai Langobarts. Chescj trê personaçs a nasserin a Cividât e a puedin partant jessi ametûts ae golaine dai Furlans innomenâts.

Pemon al ve come pari un nobil langobart, che prime dut câs si jere stabilît a Belun, dulà che al fo a cjâf di une rivolte; jessint cheste stade reprimude, il ribel al scjampà a parâsi a Cividât dulà che par altri al vivè da om privât. Cemût che po so fi al vebi podût diventâ duce dal Friûl no nus è riferît dal storic Pauli Diacun.

Si sa dome che il duce che al regnave prime di lui, Corvul, al tignì par pôc timp il ducât e, viers il 705, vint ofindût il re Aripert II, al vignì svuarbât e al sierà la sô esistence in maniere ingloriose. Al so puest al vignì nomenât duce Pemon, il cui guvier al ven a coincidi, in buine part, cun chel dal re Liutprant. A travers i pôcs riferiments di Pauli Diacun, la figure di chest duce si la scuarc cuntune cierte fadie, a trats fintremai in maniere contrastant: il tant che al baste dut câs par fâlu aparî come une incjarnazion di chel travai interiôr, che si ve daûr la conversion dai Langobarts al catolicisim e la opare di svicinament tra lis dôs stirpis, la gjermaniche e la latine, promovude di pape Gregori I e de regjine Teodolinde. Il duce Pemon e il re Liutprant, ancje se a voltis a forin aversaris, a derin di viodi la stesse violente e prepotent volontât di justizie, la stesse devozion, il stes amôr pe culture, che a ciririn simpri di favorî, il stes barbaric slanç intai lôr ats.

Pemon al fo in realtât il prin duce dal Friûl creât e che al à vivût tal gnûf clime de union: ingjenui, energjic e malacuart ancje tal meti in vore il so program di conciliazion, al invià contrascj che indi determinarin la colade.

Pôcs agns prime de sô elezion, il so sucessôr no imediât, Ferdulf, volunt meti in mostre la sô valence di vuerîr, al veve plui voltis atacât e provocât lis popolazions slavis logadis su lis Alps Juliis, e intune disastrose bataie cuintri di lôr al jere muart insiemit cun dute la nobiltât langobarde dal Friûl, cemût che juste apont al conte Pauli Diacun.

Pemon al cjapà adun inte sô cort i fiis di chei nobii e al proviodè ae lôr educazion, tirantju sù insiemit cui siei trê fiis Ratchis, Ratcalt e Aistolf, che al veve vût de virtuose femine Ratperghe. Chest forsit al è stât l'inizi di chê scuele ducâl che e fo, in Cividât, un dai plui impuartants centris di culture latine: di jê a jesserin Pauli Diacun e San Paulin.

Ator dal 720, cuant che chescj zovins a forin pronts a doprâ lis armis, Pemon ju condusè cuintri une fulugne di Slâfs che si cjatave a Lauriane; sore di chescj

al svindicà in maniere sanganose il macili di Ferdulf e al imponè i siei pats a chei che si jerin salvâts.

Come chei altris rês e duchis langobarts di chei timps, Pemon al fo larc di concessions e dons aes glesiis. Un fragment di epigrafe che al puarte il non dal re Liutprant al è stât a so timp scuvierit a Udin, inte glesie di S. Marie di Cjistiel, intant che si stavin avuelzint dai di lavôrs di restaur, e al da di viodi in vie aprossimative la ete de fondazion de glesie stesse, sugjerint la ipotesis che e sedi stade fondade graziis ae magnificence dal duce Pemon.

Ce che al determinà il contrast di Pemon cun Liutprant al fo il so contegn, forsit no dal dut injust, cuintri il patriarcje Calist. I vescui di Aquilee, discjadûts de primitive innomine par vie dal sisme di Rome e dal consequent distac dal gnûf patriarcjât di Grau, a vevin scugnût bandonâ la lôr sede aquileiês parcè che simpri plui dispès e vignive atacade dai Venits-bizantins, cussì si jerin ridots a lâ a logâ tal cjistiel di Cormons.

Intant a Cividât a jerin stralozâts, par volê dai duchis langobarts, i vescui di Zui, forsit parcè che chê sede e veve aromai pierdude ogni impuartance daspò che la citât e jere stade distrute. A un ciert pont Calist nol acetà che un vescul, titolâr di une sede che no esistevè di fat plui, al logàs inte capitâl dal ducât, e fintremai alì de cort, mentri lui al jere obleât "a convivi cui vilans".

Al rivà aduncje a Cividât, al parà vie cu la fuarce il vescul di Zui Amadôr e al ocupà la sô cjase. Inalore Pemon, disdegnât, al cjapà Calist e lu fasè metin in pereson, forsit tal cjistiel di Duin sul litorâl, cu la intenzion di butâlu tal mâr. Ma fermât dai siei stes fiis, si limità a tignîlu intune dure presonie.

Al è dibot sigûr che il pape e altris personis influentis a vevin ricorût al re Liutprant par otignî la liberazion dal patriarcje. De bande sô Pemon, insoferent ai interventis esternis intai afârs dal so ducât, al oponè un ustinât refût. Cussì il re si sustà fûr di misure cuintri di lui, lu declarà discjadût e al afidà il ducât dal Friûl intes mans dal so fi maiôr Ratchis.

Pemon inalore al menaçà di ritirâsi cun altris de sô famee alì dai Slâfs, evidentementri pesant di podê organizâ un riscat, ma Ratchis al rivà a svoltâlu e a fai fâ la pâs cul re. Cundut achel il ducât no i vignì plui tornât, ma al restà intes mans dal fi. Daspò di chescj fats no si savè plui nuie sul cont di Pemon. Chestis vicendis a succederin fra il 735 e il 740.

(Josef Marchet – da "Friuli uomini e tempi" - test ridusût e voltât par furlan par cure de redazion di Ladins dal Friûl)